

適

可

齋

記

行

適可齋記行總目

卷一

勘旅順記

卷二

南行記上

卷三

南行記下

卷四

東行初錄

卷五

東行續錄

卷六

東行三錄

適可齋記行卷一

南徐馬建忠

勘旅順記

光緒七年辛巳春余于役津沽三月二十六日午後在天津新關勘對船塢帳目嗣問招商局明晨有出口船否意欲再往沽口小住數日德璫琳言漢納根明晨乘鎮海往旅順口七八日回津旅順口新整砲壘日後挑淤浚口建設船塢爲遼海之關鍵亦爲北洋水師之總匯余亟欲往觀一相地形他日有議及興工者或可稍參末議不致郢書燕說德璫琳亦慫恿余往因遣僕持帖知會陸管駕官歸檢行裝晚十點鐘登舟

三月二十七日黎明四點二刻鎮海鼓汽解維海河曲折
勢如蚓屈而春季糧艘梭織輪舟左右避頗不易七點鐘
鎮海掠一糧艘過左偏擱淺於是倒輪牽帆良久始動十
點二刻抵大沽口懸表報攔江沙水漲九尺餘十一點二
刻出口向東偏南一度行四點二刻霧起海角東南風勁
六點一刻霧大合輪行稍緩七點二刻霧解星月皎潔
三月二十八日晨六點一刻舟抵旅順口外大沽距旅順
口一百七十邁合五百一十里舟行十八點三刻緣霧緩
輪者數刻海口向南其門兩山對峙右雞冠山高十六丈
而西陔左黃金山高四十丈新壘踞其巔工匠見輪舟至
緣脊瞭望若列螺兩山皆童峯牙矗立七點入口口深

二丈至三丈有差內橫亘淺沙深丈二尺復進水深處正對白玉山下椗山麓有舊壘遺址七點二刻與漢納根駕舟艤三官廟下漢納根自往料理余獨上廟後之塔下瞰口內全形見東西長約六七里寬無逾二里自口門入白玉山宛如人胸東西兩灣隱然兩臂右臂長伸泊大舟可數十艘雞冠山蔽之陸游擊謂雞冠山低敵彈或能及我我彈不能及彼左臂短縮潮退可涉若挑濬亦可容大舟十數艘黃金高山蔽其前敵彈斷無可及之理惟聞其泥糝石難施疏鑿午後偕漢納根陟黃金山山峻削漢納根以石磴磴道剗石填谷盤旋曲上寬平可輒利運重焉新壘之基已立中有石峯嵯岬業以火藥轟去三分之二躋

巔四眺則口內外之形勢口左右前後之羣山畢呈目前若掌上觀也南望有山屹然峙於中流者城隍島也北望白玉山後浩然無際者金洲灣也東西淺沙浮嶼若隱若現口內潮涸左臂之灣捲形浮鷺成羣啄食其上右臂之灣如半月形綠波微縐中界一泓水色較碧如著色圖翠然可別者灣中之深水也余問漢納根曰敵艦來攻壘砲及遠幾何曰擬置二十四商的后膛砲於壘角可左右前三向四邁而遙使重建一壘枕雞冠山麓爲犄角則敵艦入口左右壘砲可交攻焉再於白玉山舊壘排列巨砲適當口門敵艦斷難飛越曰設或敵艦鼓輪駛入我彈猝難命中彼進口內勢必東衝西突爲捨命之攻■將來船鳴

厥局漸次營造不幾輕於一擲乎況山巔之壘無水敵斷
汲道壘潰可計日待矣曰敵艦衝入我口口內容地無多
我砲下攻準船若的竭一日之彈敵艦必成齏粉壘中雖
無水源而一二日之水可先貯也且船塢厥局既設則三
壘之外又宜多儲水雷富鉅百萬者以千金置備不亦宜
乎曰灣內惟右臂能泊舟而雞冠山低敵砲或能及我若
何曰敵彈遠者無逾四邁我二壘之砲亦及四邁是彼彈
及我口內之艦已先受我壘中之彈矣曰敵艦或乘黑夜
來襲則如何曰是宜置電燈以燭之曰若乘霧以逼我
則如何曰口門窄難容二艦若一艦並駛霧不能窺左右
但差數丈舟必觸礁敵人斷不肯冒險深入然則霧雖我

害亦非敵利也。日口之左右灣嶼櫛比，設使敵人艤舟他灣，暗渡以襲我後，則如之何？曰：口內防禦既備，黃金山之砲可反顧而艦上之砲亦可遠攻敵。若掩襲勢必運巨砲運巨砲，則山路崎嶇，卽由至近口岸斷非一朝一夕可至。試思所築磴道平坦如砥，運砲亦需騾五十匹，敵人倉卒來攻，何能猝辦？縱或搜掠民間騾馬，然我壘我艦之兵豈同石之難轉？砲之已繫不可先發以制乎？因觀其砲壘之圖爲五角暗壘之式，所置大砲二尊，外向左右旋施位置得所，遂下山周視所擬造船塢處，在黃金山麓山障其後，頗得形勢。惟左臂淺灘浚深不易，且地多卵石，未知土性疏密。下掘有無水源至，隄陂可鑿，山石以費之，價廉工堅有。

無虞其倒塌者閱畢上船已報六點鐘矣

三月二十九日狂風如吼起視霾晦大作煙水漠漠諸山近咫尺亦不可辨而霧不利敵之說可信矣午後一點鐘霧稍斂山腳盡露癡雲戀巔風未稍息四點鐘有聲撼山谷蓋漢納根以藥炸石也升樓眺望則又連轟數聲隕石飛擲夕陽中狀若歸鳥亂投煙霧亦與之俱散因見三官廟前有閩浙船十艘膠於沙上無帆檣楫似腐朽多年未曾出海者以問陸游擊乃知此卽旅順水師之兵船傍岸之屋卽水師船塢兵船船塢皆隸金州副都統制以五百水師旗兵駕之每歲夏間當出洋會哨一次初旅順口需水師船以無廠可造奏請

飭下浙閩兩省每三年各送新船一隻歲送修理舊船油麻料若干今則水師兵額如故也例送新船如故也歲送油麻如故也而水師未嘗一巡海上船隻未嘗一出口門油麻未嘗一潤船身徒令兵役以之資生管領以之分肥勒派油麻商戶以之致困有水師之名與水師之費而無水師之效此皆泥於牢不可變之成例所致如有以虛費裁減爲請者則將以羊存禮存閉執夫議者之口嗚呼天下有名無實之事如旅順口水師豈少也哉

四月初一日風聲徹旦舟傾側不已晨起寒若小春衣可重棉漢納根在岸阻風不得登舟午後風不少衰閒觀水手操演槍砲救火等事敏捷整齊其可用也翻閱洋文新

聞紙見有載博亞民始末者博亞民居近亞非加南之善望角近攻英人英人屢挫初博亞民爲荷蘭裔居善望角英人自嘉慶十年攘其角復虐使之積不相能博亞民他徙至咸豐二年博亞民逐去蘇魯野番撫其地而有其海口曰納大肋英人畏偏逐之而踞其地博亞民內徙涉哇亞河北岸立國名哇亞北國制以民主都名貝來多尼亞英人喜其馴聽其自主同治十年值選民主名蒲爾日力圖富強以爲國強必先富民富民必先爲民籌懋遷之道哇亞北國無海口海口惟納大肋納大肋英人奪之復重征出入口之稅以困之其北有得刺哥海口屬葡萄牙可緩頰減稅惟口故多毒蚊螫斃牛馬車運甚艱法惟有鑿

鐵路以通之則可避英之暴征而貨亦暢銷議定蒲君自往歐洲貸款購料兼與葡萄牙議約英人嫉其行用計離貳其民且煽鄰近野番名加弗爾攻襲其國至光緒三年蒲君事歲由歐回見內外盡敵知爲英人所使意不少怠興兵追襲加弗爾外患平而英之納大肋監軍名散貝斯東見計不行致書於其理藩院謂哇亞北國力弱不足以敵野番卽不足爲納大肋輔車兼并之爲便且博亞民亦無不爭願來歸者使聽其自主建造鐵路則納大肋稅無所出勢必不能自存書上理藩院許其便宜從事散貝斯東於光緒四年春至哇亞北國多方煽其民民爲所惑始以地盡獻於英削蒲君爲民英人又草芥之於是激成眾

怒致有近時兵釁英人二百年來專假護助以吞噬人之土地助五印度并五印度助加諾大戕加諾大助奧削野人殪奧削野人助土而基削土而基豺狼其心封豕其能而於各國公法大會通國新聞日報猶自稱秉禮之民守義之邦噫是直如歐人謂英之君相惟利是圖妄談公法其心則長蛇也其口則羔羊也於奸取哇亞北國見之初二日晨風靜五點三刻刺艇往探口之右臂旭日初升微風習習有水皆綠無山不青棹至中央潮退艇阻淤不能進舍舟而陸山行十數里小路蠶叢耕夫牧子各荷鋤叱羊而出地雜石塊惟宜菽稷行至右臂之尾遠可十五里始知前所謂六七里者蓋俯視而小之也其尾舊有故

旅順城遺址至此內口與外海相隔僅一高隄中秋潮盛海水可越灘而入敵之艇槳亦可外艤宜置備焉聞其近地有以淘金爲業者因呼一鄉人導往行二里許則見高崗平地土堆纍纍如蟻蛭導者曰此金沙也遍山皆是問曰日淘幾何曰無多强度日耳數年前有拾十數兩重一塊者已改業他徒矣今則夏閒於老鐵山石焦下水底取沙往往有拾至五六兩一塊者然或逐波臣或葬魚腹利雖大命爲重也至視淘金之所則蓄澗水爲小池旁堆沙石一人持鐵鏟一人持木瓢鏟者鏟沙於瓢持瓢者篩諸水中浮去其麤者而存其細者淘一日約得金四五分此法桔槔之不若漏金多矣因向淘者購取三四枚有黃豆

若者而淘者云猶有蠶豆若者此蓋所謂豆金非沙中之
屑金也誠得參用西人淘洗之法獲可倍蓰於是遍跡沙
石見其現於地面者周圍六七里皆此礦沙則其深入地脈
者詎可限量華人垂涎海外金山蟻趨羶附孰意其近在
咫尺也再聞漢納根嘗老鐵山旁產煤余因以問土人答云
去歲經外國人往關東請一劉靶頭來勸視興工開井現已
見煤矣靶頭者何鑛師也殆認識煤苗百發百中如箭之
赴的不爽故名之歟復行四五里許越二嶺至一濱海龍
王廟嶺生層紙石是爲煤苗至其腰見煤頂黑石一堆乃
出自井中者作工二十餘人鋸木支井井側深僅四丈餘
因屏謂劉靶頭至問以果知其下有煤否答曰吾業此二十餘

年矣測無不中此閒無識煤者余來自千三百里無親故測至此處卽云有煤今與工纒五旬日煤層見矣曰若有爾知爲何色之煤曰此煤可煉鐵可燒炭是硬煤也隨有鎮海正管輪者入井取一硨石謂此殆與美國白煤西山白煤相似又問靛頭白爾測此煤窰寬廣何若曰此謂普山貨源頭遠甚此其尾也曰子知此煤層厚薄何若曰無逾四五尺關東煤層有厚至七八尺者然煤層以薄者爲佳薄者受壓愈重其質愈密火力愈熾此煤性也步行已十數里乏甚另買漁艇遵海灘行入旅順口剛報十二點午飯後復上黃金山周巡砲壘見所剩巉石日間已爲漢納根炸去四五矣返舟三點鐘鎮海起旋開行回津余因語陸游

擊與漢納根煤窑事謂此地誠有煤與西山若者不獨爲北洋水師之總匯亦可爲水師不竭之煤棧二人聞之亦鼓掌稱快因復順道停輪坐槳艇上岸重詣其地取煤石數斤以便測驗劉靶頭云所攜煤石非煤也乃煤層盡頭之浮面勿以此而例視後出之佳煤也

初三日午後三點鐘進大沽口

適可齋記行卷一

適可齋記行卷二

南徐馬建忠

南行記上

光緒辛巳六月二十三日奉合肥傅相面諭訪辦鴉片事

件遂有南洋之行附錄傅相六月十六日片奏再近有粵

據瓊州鎮總兵彭玉翰林院編修鐘德祥先後代呈節略

大致謂該商等擬集銀二十萬元以作公司資本先與印

度安訂章程合同每年限定運赴香港洋藥若干箱每箱

價值若干統歸公司承買繳價再由該公司發售中國各

口不准印度洋藥徑運他處售與他人如於定數尙可多

銷再由該公司寄信印度添運該公司於賣出後每箱統

交中國稅釐銀一百餘兩四月間適有英官沙苗奉派前

來中國查攷各口每年售銷洋藥數目何獻堦等與之相
見議論創設公司之事沙苗允爲留意謂若中國與印度
肯照承辦再行函知各等語該商等遂屬彭玉轉言于臣
鐘德祥假旋游粵素悉洋情深明大局亦將此意函答前
來臣推印度洋藥之來中國必須先到香港而私銷卽在

該處為多按總稅務司開呈總冊每年私銷者約有二萬數千箱以現議每箱稅釐百五十兩計之是每年偷漏銀已三百數十萬兩將來南北各口岸驟加捐數難保各省奸商不徑由香港私運至沿海無關卡之處酒賣私銷則成本愈輕獲利愈厚所謂為淵駸魚為叢殿雀患生于所備之外即法令有時而窮誠能于香港設立公司專歸公正殷富華商經營仍聽官主持一切務使全網在握毫無偷漏不但歲餉頓增數百萬而各省口岸內地之局卡及各路之巡船均可裁撤節省糜費尤屬不少聞何獻墀等多係殷富有此舉亦願出資附股蓋買熟悉華洋商情其他富民聞有特派大員前往監收按應交釐稅則明立保結嚴定章程無害是以集本不難其應交釐稅則明立保結嚴定批解其有盈餘提撥部庫亦向無慮虧缺惟香港為英國屬地有該國總督駐紮必須該商等先與該總督熟商俾英廷君臣均無扞格如能允其照辦給予憑約勿任洋商爭奪阻撓偷運私售此議乃可有成事既關乎大局權非自我獨操英員沙苗前會過津謁晤旋即回國未知該國及印度部主見若何臣于彭玉展覲回粵時已屬其傳語該商等自行與英官設法疏通俟有定議切實稟知再咨商總理衙門暨兩廣督臣核奪妥辦茲因議加各省洋藥稅釐誠恐偷漏愈多終致有名無實不得不就彭玉鐘

德祥之論聊備一說其成否尙未敢豫定除先咨總理衙門主持商辦外合再附片瀝陳伏乞 聖鑒訓示謹 奏

二十四日晚餐後上怡和新南陞船一點鐘開行天陰微

雨

二十五日晨六點鐘舟抵大沽停輪待潮天陰大雨十點鐘天霽潮生啟輪出口午後雲日晶瑩水天一色清風習習暑氛卻掃不知在伏中也向晚隱隱見塔燈知距煙台不遠二十六日晴六點鐘抵煙台以

萬壽節封關須次日乃開早餐後鎮北兵船管駕官劉步蟾子香來謁因乘舳板上岸散步而歸午後假寐片刻子

香復來邀同登陸閣眺望玉皇閣之嵯峨攬芝罘山之秀色爲之神怡旋回船夜色晦暝風雨未止

二十七日晨四山雲合大雨傾盆艙面不可坐立惟偃臥
艙中讀莊蒙逍遙遊一篇消此抑塞而已旁午天霽至鎮
南兵船晤船主洋員哥加聞漢納根附舟自旅順來寓岸
上因復登陸訪之小坐移時還舟泐寄李伯行書至鎮北
船答拜劉子香回舟後子香來送行下午開行雲霾四合船主恐
有霧駛向大洋山島不可復見

二十八日晴至黑水洋東南風大作舟搖蕩殊甚

二十九日晴風仍甚至清水洋知奈山將近午後至黃水
洋過奈山舟中晤英人毛里士即光緒二年偕至開平看
礦者談及伊今在俄國海獲葳口開煤產煤無煙一噸約
價一二兩頗獲其利其地有日本人二百五十餘名設有

領事華人約二百餘名無官保護大受俄人欺負俄人兵民約共二千五百人云晚八點鐘收吳淞口一小蓬船橫掠船首猝被碰裂霎時沈沒不知船有幾人能拯起否慘然久之十點半鐘抵虹口浦頭上岸

三十日晴使人往探赴港船隻則法國公司已先二日行矣初二日雖有商船以載貨無艙搭客初四日有英國公司往港遂定附是船午後暴雨俄霽至匯豐銀行兌銀行主加末隆前曾在津相識遂邀初二日晚膳談次適遇巴西喀公使因邀初二日早膳出過外國書肆購論鴉片事書數種而歸然燭披覽略得梗概

七月初一日晴乘轎赴泗涇省母晚十點鐘回寓往返五

時之久乏甚臥閱鴉片書數則

初二日午赴巴西喀公使約談及前此與貴國訂約極欲成盟奈其中有一款謂凡有中國人民在巴西國民人行棧商船雇工者一經犯事中國官即徑往緝捕巴西官長不得過問等語此實貴國與各國訂約所無我政府礙難屈從去歲在津議約未即批准者職是故耳因暑抱病會遣微繙譯赴津謁見貴傅相未蒙俯從固屬貴國尊崇國體之意其如我國向隅何當答以中國官治中國民於理頗順貴國何可援他國既往之事爲口實乎渠復云若然去歲美國後我修約何未聞議及此款答以美國與吾國修約意在招工之事至管制西人所役華人非修約之初

意也且余此來別有所事未敢越職議此酒闌遂別晚赴
匯豐銀行飲筵次行主進曰前者貴國欲興造火車鐵路
今接倫敦本行電報願借銀至二千萬金磅緣本行深知
華人信實非日本可比且咸悉鐵路爲中國第一有益無
損之事故願助者眾今雖不行將來終必興舉也尋各散
回寓

初三日晴早接意國公使蘆嘉德函固邀晚膳日閒料理
行裝晚至蘆公使別墅遇新到西班牙駐華公使魯祿利格者情
意良殷言及黎莼齋星使辦事練達接物誠敬彼國士大
夫咸器重之因問其目疾何似則云相與宴會數次未曾
覺察並極道欽慕傅相已久頗欲望見顏色尋又談及前

任伊公使相與惋惜不置余云伊公使前曾與唐景星觀
察議及津貼我國商船■爲來往古巴裝載華民之舉並
議在呂宋准設領事一欸其居心大有造於我國客民不
幸凋謝未遂其志祿公使答云此事甚善不第貴國人民
樂有斯舉卽我國家亦頗願華民得此利益愈有資至如
歸之美此行赴津必與傅相商之是日席閒十四人籍分
十二國蘆公使舉觴爲傅相壽且云願與此十二國人咸
祝傅相之功德■無疆余答云承貴公使頌揚我傅相良
厚甚感甚感在我傅相之心甚願偕海內諸友邦和好無
窮用答盛意言畢舉座歡笑而別

初四日晴法國銀行行東赫德加斯肋招飲言及該行總

管三人伊係其一行本極大開設徧於地球倘中國需用借項頗願効勞並可較他銀行減利至六釐並云前貴國借債之時曾有向我行談及者因慮經手人多從中取利有損本行聲名是以辭之以後中國借款似須向各行探聽利息實在情形庶不至誤出重利本欲赴津謁見傅相因印度有事故不果往敢投節略託爲轉呈晚十一點鐘登公司船略坐就寢一點鐘啟輪出口

初五日晴舵樓平眺薰風南來披襟樂甚島嶼蜿蜒起伏不斷海水忽分二色一綫斜縈青黃迥別知舟已過錢塘江口矣午後東南風愈大讀鴉片書數則與友人縱論鴉片入中國以來遺禍之烈糜財之多慨然同感云

初六日晴憑檻一望海波盡平水作豆綠色隱隱西見一山知近福州界矣怡和行主名開斯味者亦附船由港回英敘談良久甚相得也渠曾在日本橫濱管事極言日商反覆無信視券據若空文而上海設行歷三十餘年與華商往來交易不啻千萬萬會未少折分毫蓋華商一諾千金有無事筆據爲憑者味其言與匯豐銀行暨法國銀行主人如出一口而後知西人稱宇內行商首推華人爲不誣也渠又云國強基於國富國富惟賴行商華人率精貿易富國之基在焉乃貴國不惟無法推助且多方阻撓此而欲求富强猶緣木求魚也但華商不學無術人多鄙吝士大夫既不屑與交卽我西人在中國者亦從未聞邀華

商與宴誠使華商讀書通文彬彬習禮則士不鄙棄西人
樂交將見爭利於市較爭名於朝者日眾非講求富強之
一道歟余未敢率對附識於此惟明者擇焉

初七日晴風平水急舟逆流行甚搖蕩遠望風帆葉葉漁
舟無數遙山縈帶已過汕頭午飯後與怡和行主閒談邀
余寓其行中因恐於公事未便卻之晚十一點二刻抵香
港進口夜深末由登岸遂寢

初八日早六點鐘登陸探尋舍館則客履已滿惟洋
房客寓尙有隙地遂居之卸裝後即將傅相致香港撫軍

函投遞外附洋文一緘

洋文緘傅相屬余代擬略云適者

法以期辦理之盡善本大臣前次在烟台訂約于鴉片增
稅一欵沈懋勤馬乃荏甫五年未曾踐約是所望于貴大

臣之良謀碩畫者也。本大臣亟欲考究其底蘊，特遣馬道
建忠至港，將由此而西貢，而新加坡，而加爾古，答惟求訪
問得實，行蹤均屬未定。至本大臣之意，馬道知之甚明，亦
將直陳于貴大臣之前，望貴大臣深信勿疑。如馬道前往
印度，尙祈函致該請訂會晤期，頃之撫軍燕泉斯命中軍
處制軍爲之介紹。請訂會晤期，頃之撫軍燕泉斯命中軍
高克斯戎裝持其刺來見，傳語謂撫軍居山巔路遙，恐相
左，不敢枉駕。明日有事，須至山下，公所當遣价奉邀云云。
午後至公所，答中軍之拜，回寓燕泉斯參贊。歐德理來訪
歐英人也，爲燕心腹，居港多年，能廣語待華人，甚善與。駐
港葡萄牙路領事交最厚，余以意國蘆公使致書領事，
託其介紹領事爲歐言，故歐來先施談次，意甚洽。歐因謂
明日有郵船行，撫軍事繁，倉猝謁之，恐不能盡詞，不若郵
船行後，公暇往見，爲便其爲謀殊忠也。

初九日晨雨俄晴大西洋路領事匯豐銀行行主甲克松次第來拜路謂華民寄居吾澳門者不下香港與港甚近輪舟往返一日閉耳公暇或可往遊與我總督相見亦兩國和好事也答以奉諭來此未敢擅往澳門且貴國與我國久立和約迄今未換致疏往來是貴國實使之非我國失好也言訖別去晚五點鐘歐參贊過訪謂郵船將行撫軍公宥今日不能相見特來致意務希勿怪

初十日晨雨怡和行主開斯味來訪談及撫軍頗好名事拂輿情以爲異日選進議院之地其善待華人者亦名心爲之也晚四點鐘郵船已開往公所見燕撫軍燕猶未至先與歐參贊談論移時歐謂撫軍會言閣下旣奉傳相書

來凡一切有關鴉片煙者悉憑誠相告旋詰歐於鴉片一事意見何若渠云此閒議論甚多欲承辦者頗不乏人但所論未盡可行其人未盡可信耳總之撫軍甚敬傳相事專心乎中國凡權力所可助者無不助也繼問沙苗係何如人答云沙苗係倫敦印度部中司員此來有外部憑信到印度檳榔嶼新加坡西貢香港暨中國各口查察鴉片情形實係英國遣來者復問以沙苗意見若何云沙意須各口自與印度商量或立公司或國家承辦定以箱數限制偷漏自絕此意實屬創見七日前赫德信來亦及此事現在印度國家於鴉片一節殊費躊躇沙說其可成也談次俊星東監督亦來拜旋接撫軍電報云頃已駕車忽山

水暴發塗崩難行約明日再面云

十一日晨陰雨讀鴉片書數則午後天色放晴二點二刻鐘接歐參贊來函謂燕撫軍已下山至公所相候遂肩輿

往謁談論良久問答另詳節略節略暨筆談以無文義另編茲以日記付梓恐閱者

未得其詳爰擇有關事實者增入記中以備顛末餘仿此

余云鴉片入我中國其毒較烟酒百倍貴國征法國之酒

值百至抽以百二十法國征他國之烟值百則抽稅倍之

印度鴉片歸官督辦售出之價視收買之價幾倍三焉貴

治抽鴉片稅亦至值百抽百現查去歲由香港運入中國

各口鴉片至八萬七千七百四十七箱估價至五千八百

二十四萬二百三十五元如以貴國征酒與征鴉片之法

稅之其數已與估價相埒而走私二萬箱仍不與焉我天

津條約鴉片運入各口每箱准征三十兩尙未至值百抽

十之數縱加以內地釐稅亦不能過值百抽六十之數是

以我傳相燕台定約有增加釐稅每箱至百五十兩之議外人

約近左中堂亦有增加釐稅每箱至百五十兩之議外人

有訝爲重稅難行者不知以百五十兩論之較貴治所征

日之議迄未施行者無他恐驟增其稅偷漏愈多得此失
 彼未為勝算故特遣本道趨謁訪求良法務期烟稅可加
 而漏私盡絕且使主持鴉片之權歸公家而不歸私販庶
 期年減一年漸有銷除之望祈貴撫軍大力有以助成之
 也燕云鴉片一節為吾中英最切要之事未接貴傳相教
 論時已將此事稟知本國政府因出示底稿其略云鴉片
 由印度運入中國先躉寄香港尋覆由港零運各口在港
 煮烟零賣為數甚少而歲征之稅業已二萬五千元矣前
 已函致威公使謂自港偷運入中國口岸者漏稅歲約百
 萬兩而偷私者專以香港澳門為淵藪吾國既與中國和
 好應助其力所不逮今鴉片之漏私若此如威公使及他
 人有妥善之法使偷漏可絕中國能盡得其應收之稅者
 吾國自當允從由是觀之援助中國能杜絕偷漏本大臣早
 具此心至加鴉片釐稅一節乃暗寓禁止之意縱加至值
 百抽百亦不為多云沙苗意見貴撫軍以為何如燕云
 沙意謂凡售鴉片之處如新加坡西貢香港中國等口皆
 應由國家責成公司歲向印度國家售運所銷鴉片箱數
 印度國家除售各該口承攬公司外不能再售他人出入
 之數全網在握豈覆有走私之弊赫德來函亦極道此法
 之善惟販運一經商人推利是圖或每歲運入故溢其數
 以為多銷地步甚或設為銷售不暢未能抽征及額徒使
 商人借公司之名肥其私囊而於公帑仍無補也孰若國

家自行承辦先向印度每歲定購鴉片若干箱運儲香港而後增其價值或倍之或半之分售各口承攬公司准其散賣不覆再征釐稅是則權自我操不慮商人舞弊且香港一口本國約內載明豁免關卡各稅故港內無關亦無緝私丁役今貴國准商人在港設立公司承攬販運吾國斷難許貴國在港設員抽征其稅因于港例大有礙也如貴國自行販運未售各口之先寄儲港內凡我同好諒無難商之理其實貴國自行販運增價專售與征取公司稅釐無分彼此也余云貴撫軍爲我籌謀甚善惟鴉片產自印度由公家售賣不識印度國家願專售于吾國絕不絲毫分售他人否問貴撫軍與印度制軍素稱莫逆往來函牘亦旁論及此否燕云前接印度制軍函思籌善法大致亦主沙苗之議貴傅相來函謂閣下將有印度之行此意甚善貴國與印度商務日煩貴國理當遣員往來以通信好况有必商之事如鴉片者乎余云本道來此傅相諭云既見貴撫軍印度之行惟尊命是聽燕云印度之行本大臣當爲貴辭別回寓晚肅上傅相稟函等件道審思之

十二日晨雨俄晴封發稟件午後至公所晤歐參贊邀看房舍布置整潔擬埽除以館余者情殷如此殊難峻卻只

得徐圖移駐余因論及港例不得稽查出入口貨倘日後中國設立鴉片躉船棧房得毋勢同畫餅歐云二年前撫軍聞貴國與日本有隙曾出示以鎗炮火藥列諸禁貨後有兩廣制軍澳門官長遣員至港購辦軍械必須持有憑照方准出口倘貴國在港設立鴉片躉船棧房但須將鴉片列諸禁貨即可稽查偷漏亦於港例毫無窒礙並云燕撫軍亦有此意且出示列爲禁貨其權操自撫軍無事通知英國政府也尋晚回寓

十三日晴禮拜日無事午後邀王紫詮往遊英國公家花園石磴迴環林木清幽下視則海島帆檣歷歷在目天然好景不數圖畫矣尋夕陽在山興盡而返讀燕撫軍

致其國政府密牋言港中諸務者

十四日午刻晴至公所歐參贊出鴉片案卷九十二件皆十年中有關鴉片之事者儲之一室使余日往繙閱午後燕撫軍至公所相見云貴道來此情節昨日我已致書詳達於印度總督矣談次俊星東監督來拜余入室內靜閱鴉片案件隨閱隨譯日暮歸寓

十五日晨陰雨午前至公所晤歐參贊密談良久下午燕撫軍邀俊星東監督及其眷屬宴飲乘閒獨坐繙閱案卷移時宴散撫軍謂余今日日暮不及暢談明日相晤當與貴道將赴印度事宜細爲商酌也尋回寓

十六日晴晨命隨行洋人收拾返津午前至公所晤歐參

贊小談回寓料理行裝擬明日附法國公司船南行余之南行也以鴉片產於印度其權非操之燕撫軍故決意前往印度相機探訪妥密籌商方有綱領午餐後肩輿至山頂迴環百折計半時之久甫至燕居晤商至印度一切事宜燕親泐致印度制軍及新加坡與孟買撫軍各一函交余以爲介紹書意甚爲周至孟買在西印度卽出白皮鴉片之地其繁富聞且駕乎印度加爾古塔省會之上晚繕上傅相稟函及日記等件三鼓就寢

十七日晴封發稟件十點鐘燕撫軍命歐參贊以坐舟來送情殷意摯令人可感遂偕歐參贊乘小輪舟登法公司船船甚寬敞入艙小坐歐辭去十二點鐘啟輪出口

十八日晨陰舟行甚疾島嶼希少已入安南界矣午時測得舟行二百八十二邁午後雷電暴雨如注緋閣魏默深海國圖志所論五印度沿革博採歷代書史誠無遺憾惟緋譯地名悉與原音未合閱者終難了然晚復雷雨大作十九日晨晴整理前譯鴉片案卷錄存尤要者數則一查得鴉片進口箱數凡輪船自印度運鴉片入港領有艙口單旋由港撫月咨其數於印督所運之煙其分五種一產於巴達那者隸東印度俗名公煙一產於貝那羅斯者同上俗名姑煙一產於麻爾哇者隸西印度俗名白皮一產於波斯國未識俗名一產於土耳其者俗名金花今查自同治十三年至光緒六年七年之間所運公煙十二萬一

千八百二十七箱姑煙六萬零九百二十二箱白皮十八萬七千八百六十一箱波斯煙一萬六千九百四十四箱又四分之一金花一千一百三十二箱其公姑二種則自東印度加爾古答出口白皮則由西印度孟買出口波斯煙先自蘇合出口今則改由波斯灣之蒲西出口土爾基金花運至者甚少前由保賽出口今概由蘇合濟裝載於光緒元年曾由英京倫敦載至二十箱蓋僅見也其裝載鴉片至港船隻統計七年間每月多則八次少則四五次大約英法二公司居多沙遜洋行則有專往加爾古答裝載鴉片之船怡和洋行船亦無月無之每月運到箱數旺月九千餘箱間有至萬餘箱者少亦四千餘箱 一查得

同治十年至光緒六年十年間運到各種煙數以及估價之數備列於左公煙二十六萬二千零七十九箱估價一百五十六兆四十二萬二千七百三十四元姑煙十一萬四千七百五十八箱估價六十五兆四十一萬六千零七十三元白皮四十一萬九千九百十七箱估價二百六十七兆七十七萬四千六百六十三元波斯煙二萬三千八百一十一箱又四分之一估價十二兆九十七萬九千一百六十九元金花一千四百三十八箱估價八十五萬一千二百三十一元總計十年運到鴉片八十二萬二千零三箱又四分之一總計估價五百零三兆四十四萬三千八百七十三元 一查得本年西歷四月二十二日沙苗致

燕撫軍書啟者職員爲印度及外務兩部遣來印度飭訪鴉片事務今至貴治務乞將有關鴉片文件擲閱爲幸旋沙苗往廣東省垣復至香港借理水廳察得自西歷五月初一至初七日出口船二十四艘所載煙四百四十六箱其間三十五箱載往澳門餘則載至台灣福州廣東等處而載往舊金山者不滿一箱一查得光緒五年八月間有廣東紳士伍紹榮至香港投一節略內開各節如左總署函致廣督云威使意欲裁撤五廠惟在港設一廠由廣督派員管理會同港撫暨粵關稅務司妥商著各煙土庄口報清煙土數目以杜走漏稅務必有起色經費亦可減少而總署答云此意甚好卽函致廣督委派委員試辦一

年或數月如果稅務起色經費可省再將五廠裁撤似可毋庸另請稅務司會辦云其時克稅務司云倘責余承辦歲可抽釐稅六十餘萬兩經費可省廿餘萬兩惟須將五廠裁撤止留一廠各憲答云稅釐各有所用釐歸廣東前已收至五十餘萬兩加以正稅何止六十餘萬兩此說難行各憲閱克稅司云鴉片一箱約可稅銀若干答云多可加至百二十兩若加百五十兩似乎太甚恐難辦成今海關監督遣余來此請撫憲設法著各煙土庄口報清銷貨數目由廣督暨監督簡派委員來港專辦並乞貴撫幫同料理不請稅務司會辦如開辦一年或數月稅務果有起色即可將五廠撤去以期兩便一查印度政府議臣巴

登所議鴉片一節云印度出口貨以鴉片爲大宗而公煙
易碎姑煙堅實碎則煙土零星恐難暢銷是當設法以杜
其弊前者會向香港商務局查問公煙姑煙以及白皮三
種鴉片價值高下之由則云其價值之高下一視出口貨
之多少爲定沙遜行主則云自中國內地自種鴉粟則印
度鴉片不能暢銷然所以不能暢銷者價昂故耳倘或鴉
片出口日多則價賤價賤則人爭購買而內地鴉粟不能
與印度鴉片爭價則印度鴉片必暢銷矣我駐劄北京威
使臣會云中國雖栽鴉粟終難禁止外來鴉片緣鴉片稅
項歲進二百餘萬兩倘禁外來鴉片則稅項將無所出吾
知中國之計必不出此此第就中國形勢預爲臆料之說

未嘗爲印度鴉片籌一出銷之路也前游香港見華人行商最惡經手者從中取利初開口岸吾英人來往運貨獲利良多及德人美人同時運貨較英人運貨稍賤而英商之生意日減今則華人自行運貨其費更輕於德美諸商而德美之生意亦減倘若准許華人逕往印度採買鴉片不必輾轉於洋商之手則鴉片價賤價賤則出銷者愈多矣惟華商與吾國交易概皆以貨易貨華商所出之絲茶運至倫敦印度之餉項亦須運至倫敦法莫如今華商逕至印度採辦鴉片而於倫敦劃兌則華商與印度度支既省轉折之費而印度之出餉不致虧折豈不兩便是所望於我政府熟思而審察之

此紙上標密由印度寄至香港

者一查得港例煮煙出賣悉由商人至煮煙公司領票承辦承辦之人三年一更未更之先出示擇定日期招攬各色商人屆時前赴公司當眾叫賣憑票方可煮煙出賣所有章程約舉於左一領票之日當納一年票價銀若干元七二兌足一除納票價銀外須多付一月爲押櫃之費一年中不得推諉閉歇一須有殷實人擔保方准買票凡有短欠悉責保人賠補一每月票銀須於每月初五日內交付過期差費悉由領票者出一領票只可在該店煮賣其存儲他處者悉作私論一每月煮煙土若干隻每隻另納稅銀八毫每日開煮之數當報明公司倘煮多報少除將票繳銷外照例科罰一夜間不得開

煮倘起貨交客當先到公司申報方可違者充公科罰

一該店開煮本公司所派中外巡丁查察其有阻擋者卽以私論除繳票另行科罰 一所煮煙土須真正貨色每

隻以公膏三十兩爲額其有攪雜他物者查出充公科罰

一每隻提膏過三十兩卽是有心影射不得襍和於上
日前煮之煙膏爲辭 一煮零碎煙土不成隻數者定以
湊成生土四十八兩一隻爲額以杜奸詐 一每日至公

司報明所煮額數亦當同報上日沽出熟煙多少 一凡

有沽買熟煙出口者須先將熟煙抬到公司驗明領出口
單貼在箱面每熟煙一千兩出稅銀八十元違者查出充
公繳票外另行科罰 一領票者或有遷地舖須先行報

知公司一凡煮煙之爐須照量地官所定之式起建不得任意爲之以上科罰銀兩視和煮之煙價倍之今則巡丁稽查甚密查出私煮每年甚少午後測得舟行三百十七邁約明日午前可至西貢晚風浪殊甚

二十日晨晴午正至安南西貢口外雅谷角風雨交作舟欹側而行浪花飛濺艙面盡溼尋領港者刺小艇來舟遂乘潮進口河道狹曲有似津沽四點鐘至西貢埠頭按安南地有十二省今南方六省屬法管轄殆割其國之半西貢特六省之一隅耳其河爲瀾滄江之支流分派甚多廣資灌溉以故田疇肥美每歲出口米穀約六百萬包亦可謂足食矣登岸至泰昌代理招商局訪張霽霖已往堤岸

堤岸距西貢可十餘里盡僑華人煙戶稠密街道修整余前曾游兩次未晤晤其友張鏡河

詢及此地鴉片則云每歲交易約值百六七十萬元向歸商人零運明歲擬歸法國公家承辦云談次固留晚飯飯罷回舟

二十一日晨晴早餐後登岸復至招商局則張君歸矣遂呼車偕訪舊識法國駐港撫軍味納爾適告假回法代理者爲德里盎總兵赴其廨時早未至乃順道由花園一路市廛連接大半我國廣閩之人花園無甚可觀惟樹木叢襍有虎三頭鳥數籠而已回車至代理撫軍之室接晤甚歡問答另詳節畧留午餐餐次訪知味納爾回法有事借貸欲興造鐵路五六百里他日連軌東京其志頗大歲

杪卽可興工食罷其先鋒駕車送余至招商局回舟小憩
四點鐘啟輪出口晚間風浪大作

二十二日晴午正測得舟行二百十七邁距新加坡四百
三十邁午後筆述與代理德理益問答節略繙閱魏默深
海國圖志數十頁

二十三日晨晴風平浪靜午正測得舟行二百九十邁午
後寫家信及洋文信數封晚十一點鐘抵新加坡天氣陰
晦待潮不能進口

二十四日晨晴黎明進口櫛洗畢登岸至旅店卸裝後卽
乘車往謁本埠英撫味爾德則已赴檳榔嶼矣順道訪中
國蘇領事午後訪代理本埠撫軍市米德坐談良久問答

另詳節略

余詢以新加坡運載鴉片出入口例彼答以該埠例不征稅而入口鴉片專銷本口者則運入

煮煙公司其餘箱隻不得私卸亦在暫躉埠內轉運南洋各島者計去歲該埠共入鴉片八千七百七十四箱其間姑煙入千三百五十二箱公煙三百三十五箱金花入十八箱轉運于南洋各島蘇門答喇亞哇呂宋者七千三百七十五箱運往香港西貢者不在此數是本埠盡銷一千三百九十九箱倘中國禁止鴉片令出必行要無慮本埠之私偷進出船隻各有艙口單照單卸貨必不能于單外偷卸分毫也

晚餐後辦發公事稟

件

二十五日晨晴封發上傅相稟函等件蘇領事蒞清來答拜接晤少坐蘇邀下午往游前領事胡君璇澤花園並在園中小飲卻焉不可胡君久負盛名爲此埠中西人望前爲我國領事並兼領俄奧兩國事今已物故故園僅存午後乘車至匯豐銀行囑買船票順道訪蘇君小坐遂游公

家花園野花雜樹無足觀者尋訪匯豐行主於其家晤談
天欲暮矣乃赴胡園晚餐同席者爲蘇文案張繙譯及船
政局購買木料委員余姓者園主人胡君之子亦與焉席
散回寓

二十六日晨晴檢點行裝早餐後至蘇君處辭行遂登舟
舟窄隘殊甚炎熱異常三點鐘開行舟向西北行頗穩
二十七日晴無事三餐後靜臥看書而已晚十一點鐘至
檳榔嶼口外停泊

二十八日晴進口聞舟泊二日乃開遂登岸借住閩商顏
金水棧中聊避暑氛此間華商僑寓者約八萬人閩商爲
首廣幫次之非如新加坡之富戶盡屬廣人顏之居室悉

仿西制埠內華商皆構別墅翬飛鳥革洵足爲吾國生色
不圖海外竟別開生面如此既偕其本埠所謂撫衛司名
嘉爾者乘車至麓旋坐筍輿盤旋折上上瞰高壁下臨深
淵淵中古樹參天高矗雲表有至三四十丈者甫至山腰
四圍島嶼拱列涼風襲衣胸襟頓爽又上則路愈峻削肩
輿者黑人流汗浹背如水潑漆几上喘氣若牛蓋已高陟
二百九十丈矣至巔則撫軍在別墅焉入座欸談情意殷
洽渠謂吾國倘能設法杜絕偷漏則新加坡檳榔嶼二埠
必能嚴查不使少許鴉片飛越二口也繼出妻女相見少
坐辭別下山回寓

二十九日晴埠中督理瑪克奈者遣嘉爾來寓邀余早膳

乘車至其家同席有理刑暨總理工程者二人敘談良久
瑪克奈謂本埠殷商盡係華民然鄙陋不可與言惟辦事
信實故能起家余謂是宜多設華英書院化其鄙吝之風
僉謂良然尋偕嘉爾回寓中國商人承攬煮煙公司邱天
德偕代理招商局務同知銜胡泰興並鉅富辜上達邱忠
坡等來謁言語不通以英語爲問訊伊等英語又不能深
解賴嘉爾能聞廣語爲之傳譯因知彼皆生長於斯其祖
若父率自瓊州乘東北信風至暹羅越嶺而來無逾一旬
亦間有至新加坡紆道至此者因問伊等何無首邱之念
嘉爾答以彼之祖父偷越至此本干中國海禁今則海禁
雖弛而彼等已半入英藉矣少坐嘉爾辭去復乘車出游

至棧東顏宅小坐而歸撫軍味爾德遣价持新加坡檳榔
嶼二埠鴉片出入口章程併煮煙公司之例來閱之甚善
徐當譯出備攷焉

三十日晴摒擋衣物茶後回船十二點鐘啟輪往加爾古
答出口後舟行甚速一點鐘約行十二邁貨少船輕之故
也

適可齋記行卷二

適可齋記行卷三

南徐馬建忠

南行記下

閏七月初一日猛雨風浪大作且舟小搖蕩殊甚

初二日晨雨俄晴風浪猶甚島岸莫辨惟蒼波一片浩渺而已夜半過椰子峽至此舟行六百二十邁距恆河口尙餘六百四十邁

初三日晴風息波平舟蕩如故偃臥舵樓披閱洋書閒與友人共話

初四日西南風大作暴雨舵樓盡溼悶坐艙中苦熱異常夜十一點鐘海水漸黃見水面紅燈一盞乃口外標燈距

口尙有四十邁自此則每五邁設一鐙標按恆河發源西
藏經東北印度至此出海口外活沙淺灘歲變月更故設
標鐙以爲船導耳

初五日晨雨八點二刻潮至舟起旋入口恆河曲折舟行
頗緩午晴三點鐘過烏大故王宮四點鐘至加爾古答關
胥登舟搜檢甚苛旋至大東客寓居住

初六日晴聞本埠撫軍亞散依登者自答齊冷消夏回署
英屬印度區分三省省設一撫軍復設制軍以統之每逢
夏令酷熱異常且多雨霉溼不可居各撫皆於高山置別
墅焉制軍別墅則在西末喇距加爾古答之西北約四千
餘里火車約二日夜程復須乘山輿高躋八百餘丈計一

日可至制軍歲以春初去秋杪回答齊冷則本埠亞撫軍別墅高亦四百餘丈適在希馬拉雅山之隅其陰則前藏也距加爾古答火車一日程午前往拜亞撫軍則已知余奉委至此之意敘談甚洽問答另詳節略因邀余晚宴遂辭回寓午時熱甚汗出如雨靜坐不敢復出晚赴亞招會者四十餘人皆各局所之總管席間談及亞向官緬甸緬國分四部今海疆三部已屬英轄且開闢鐵路連絡省會華人商於耶古海口者約萬餘人率皆豪富又詢知答齊冷之北爲西基小國居民五千餘人東界菩營西界廓爾喀由西基北踰高嶺則至前藏惟嶺之最卑者亦高七百里三冬積雪人不可越夏秋間可度約二十日程藏人之

販於斯者歲以于計又云前在緬甸擬由阿瓦取道北達滇省然野蠻梗頑難以馴服今勘知由西基菩蕾可通滇省昨已集議築一鐵道先達菩蕾云宴罷茶坐復晤土酋巨富者數人能操英語度其詞意頗以西國之政治爲不然云

初七日晴午餐後至亞撫軍參贊高克來處晤談詢以鴉片由官收賣作何辦法高答云凡民人欲種鴉粟者報官丈地由官發本闢種收成後盡數繳官官爲扣除領本並征其額稅餘則悉付種戶旋將鴉粟發官廠製成鴉片運口拍賣此其略也至詳細章程可向總理鴉片福貝斯詢之因泐一函付余約明晨往晤午後無事至其審院一觀

則英之問官中坐右一土人傳語左列律師數十人英土
參半每訊一案官先問原告而被告之訟師詰之判決如
流轉瞬結數十件皆係錢財之事被告者率係土人合掌
聽審慄慄惴懼既出過街市輒擊肩摩儼然一大都會竊
慨旁甲喇省久屬元裔印度史稱爲蒙古朝順治十年英
人與蒙古王阿郎克散盟於恆河立約租地康熙二十一
年復爲阿王逐去三十一年阿王卒嗣王阿申阿卽位英
人復向其購還故租地卽今之加爾古答肇築炮台名曰
維廉時適英王維廉第三在位也於是英人盤踞者根深
蒂固漸次逐去蒙古諸王悉占其地二百年前叢爾租地
今成印度省會可不哀哉旋驅車至維廉礮臺周巡一視

壁壘如故旁有公園一區英兵正奏軍樂聽者麤至停車聽數曲而歸披閱西人論印度書頗爲詳確安得優游暇日几淨窗明繙成印度志一卷未必無補史官之采擇也初八日晴十點鐘往晤總理鴉片事務名福貝斯小坐邀往觀拍賣鴉片之處廳事長數十丈寬約五丈中坐叫價者下列兩案一案坐副理鴉片事者每以五箱一叫出價最高者簽名副理標其價數並旁押暗號一案坐收銀者買主簽名後卽往押銀票付收銀者以爲質約一時之久出賣五千箱買主坐列三百餘人猶太人最夥間有波斯人及英人怡和行爲英商之首旋出詢總理以官收鴉片章程并拍賣規條渠答以章程煩襍難更僕數不若閱書

易明也因出書三卷曰二卷係鴉片局員各色條例舊板無存新者未出茲權以借閱他日翻刻後再行寄呈其三卷則客歲鴉片局年終詳稟制軍之條略可收覽焉回寓披閱則二卷中皆考取黜陟局員之例與局員勾稽鴉片之法瑣碎至千餘條局員亦不下千餘人其詳稟內則載各色鴉片衰旺之故至備午後匯豐銀行主毛理士約往觀印度官銀行崇樓高廈壯麗非常內分國債國用鐵路鴉片商務五司各司其事條理井然書手執役者五百餘人每歲出入約五六百兆金磅觀畢至匯豐銀行晚餐同席者總司官銀行暨法國銀行二人談次伊等謂印度人愚迥遜華人之智其土地止得中國三分之一而歲出度支

已六十兆金磅視中國幾八倍之中國賦稅之相懸由於懋遷之未善而究其原則非華商之不知懋遷苦無懋遷之良法耳余謂吾國待民極厚故稅歛務薄至有緩急則輸將恐後固無待苛法以征之也彼皆唯唯不答尋回寓

初九日晴得撫軍參贊書詢余今晚如果起程將電知制軍處管理交涉事務總辦先爲料理一切並飭知總理火車者另備安車以待答復後整理行裝午時酷暑不可出有本埠撫軍處相識之士酋名磨羅者遣其總管持會星使所賚頭等寶星公文一紙上蓋關防旁譯英文詢余果爲中國國家所賜佩帶者否答以既有星使之印則爲吾國所賜無疑晚八點鐘乘車往火車廠路過鐵橋橫跨恆

河長二里許聞營造五年方竣誠巨工也九點鐘開車過桑代那哥地屬法國乃康熙二十三年蒙古王亞郎克散所讓給者居民三萬四境皆英地蕞爾十餘里介乎其間誠類彈丸黑子然英人畏其栽種鴛粟及偷漏鴉片相約禁止而歲輸三百箱鴉片價值以酬之十一點過蒲爾土居民三萬五千有土酋富甲旁甲喇省田廣二百五十里袤百六十里歲輸稅計十萬金磅俄過平野燎火忽明則土人之火葬者按印度俗尙火葬夫卒焚骸婦必入殉用稱貞烈今英人設例嚴禁火葬雖未革而嫠婦不殉夫矣夜半就寢

初十日晴所見土地卑窪恆河橫決車過堤上如行湖中

七點鐘半至巴達那地出公煙民奉回教晉時象教大盛遺蹟猶有存者乾隆十三年土人坑英兵二百名英怒興師奪之今英國於此設立鴉片官廠九點鐘至提諾布爾乃英兵戍所早膳後過桑肋河橫亘一橋長二百五十丈寬五丈橋門二十八河發源中印度經千餘里至此匯入恆河前次淤塞歲有水災英人濬之費金磅數十萬居民德焉午正至蒲哂爾乾隆二十三年英將磨羅戰敗烏大王於此因割比亞一部行成今屬旁甲喇省四點鐘車過貝那羅斯地產姑煙印度人稱爲聖城城濱恆河相傳此水可消罪孽故每晨四方男女來浴者可數千印度酋長亦皆建別墅於此以爲懺悔之所西人謂此乃佛祖誕生

之地或謂牟尼道成講經斯土今其城北十里古廟遺址
瓦礫堆積里許僅存浮屠半級高尙七八丈以五色石砌
成相傳舍利講法華經處今則佛教已廢而波羅門與回
教之廟林列可干計此地往來火車極多盡載土人土人
乘三等艙中坐十二人駢肩抵足有類囚車四點二刻至
蘇納爾始見山岡礮壘據其巔乃蒙古王巴貝築之以拒
英人者七點鐘至依喇亞巴爲中印度首府置監司有城
垣焉東距加爾古答西距孟買北距那奧爾適當其中城
內蒙古第三王亞克巴故宮尙在英人用儲軍需一石柱
高八丈相傳漢初印度王亞薩迦集成藏經捨生於此自
昨夜至此十一時馳五百六十四邁其速率僅及西國火

車之半緣沿途村密土人搭車者夥故尖站較多于刻至康波羅爲英兵戍所駐防者七千人鑿河引恆水以達耶末那河溉田數十萬頃用防凶災糜金磅百餘萬云

十一日晴所過平原廣衍彌望無際牛羊成羣椰林漸稀蓋已至北印度氣候稍冷七點鐘至董大喇道旁有城名亞格喇關門十六爲蒙古後朝建都之所蒙古朝自亞克巴奄有北印度偃武修文民殷國富傳及其孫名阿申阿有嬖姬曰夢姐有殊色早天王哀之築墓宮側上建回廟廟製奇麗玉壁金階高捫星漢地用五色石嵌成花文搜括國內珍寶悉以充之所費不下一萬萬羅貝作工者日二萬人歷二十二年乃成然已財殫力竭一再傳國社遂

墟雖廟內鑄金字回教高朗經徒壯觀瞻不能仰邀蔭庇
是可哀已今英人歲修其廟毋令圯毀好事者往往涉重
洋至此遊覽咸謂見所未見爲古今第一奇觀也午正至
加西亞巴乃東印度與北印度火車分道之界有戴蘭城
城垣以紅沙石螿成爲蒙古前朝所建門分十二城外周
圍五六十里皆頽垣敗瓦相傳周時有波羅門都此輾轉
而至如來教王又展轉而至亞福根朝波斯朝及至蒙古
朝已不知幾歷年所矣今屬英轄降爲郡咸豐八年印度
兵變踞此一載方爲英兵所破光緒二年英后晉號印度
皇后五印度各藩屬酋長輻輳來此望海西而效嵩呼今
古之變如此二點鐘至莫羅多英之重鎮也咸豐八年兵

變卽肇衅於此初英踞印度未設官以公司商人代治之
商人惟利是圖罔知大體魚肉其民百餘年來積怨刺骨
適蒙古與諸藩王後裔餘灰未燼時欲復然遂散布謠言
煽惑兵民之心時製來復鎗須以脂塗彈方可入孔印度
教與回教皆忌豬肉英人以新鎗發與土兵試用土兵不
從遂殺英弁而叛東北中三方聞之響應盡屠英弁而坑
其妻子時督印度者爲凱令調兵攻勦二載始平於是徒戴蘭
故王於緬甸戮其子孫英廷方悟公司之苛暴不可復用
遂改爲官治今則學院議事房審院皆准土人列坐非若
前此之蔑視矣晚九點鐘至盜巴喇下火車自依喇亞巴
至此車行五百二十六邁由此往西末喇鐵道末通晚餐

畢覓顧雙層馬車上載物中臥人因日間暑熱乘涼夜行
風露生寒須加夾衣十數邁至灘河闊可半里水急而淺
車加六牛亂流而渡水及車茵一路平沙曠野漸有游牧
之風假寐片時則遙天放曉已抵高山之麓名喀爾喀記
程三十八邁

十二日晴北距西末喇四十八邁小坐茶點後七點鐘換
小馬車二輛一載物一坐人余乘車緣山而上遇磴道爲
山水衝崩車不可過遂步行過險換車馬行十五里一換
一點鐘約行二十餘里山程一百五十八里計四時可達
盤旋百折峰巒漸峻幸道路寬整時有土人修之十二點
鐘約行九十餘里至英國所設行館下就午餐已登車復

言行卷三
行攀陟愈高萬壑千峰瞥過足底前視高峰撐雲拄日皆
車轍所必經也下午四點鐘片雲忽起微雨送涼有類深
秋俄山勢漸平屋宇較多已抵西末喇山市之下蓋已高
陟七百餘丈矣乃下就逆旅卸裝

十三日晴涼甚早餐後管理外部雷亞爾接加爾古答之
電特遣員埽除館舍請稅駕馬偕其委員往視之屋據山
陽製尙雅潔乃入居之館有小樓可眺遠北望高插天際
浮雲蔽空長如臥龍者則希馬拉雅正山其餘皆旁幹也
午後往晤雷君遂以公文與燕臬斯致黎制軍書挽其代
交並託以代詢謁見之期返館後乘山兜繞山一游街道
不多而屋舍參差蕭然有林泉之致查西末喇舊係回莊

道光十四年有英弁至此游獵覺氣序清涼遂稟制軍建
築別墅今制軍每歲避暑於此西人從者甚眾遂成市焉
十四日晴雷君來函約本日午後謁見制軍制軍參贊亦
有函來午後衣冠乘輿赴制軍解解據高峰之巔制頗宏
敞進見禮貌溫藹問答另詳節略談次謂鴉片事余第綜
其大綱至其詳則須與戶部細談方可了然旋命參贊作
函致總理戶部貝冷囑余越日往晤尋辭回寓

十五日晴早餐後往拜貝冷坐談良久問答甚長另詳節

略余云鴉片爲害世所共知貴國都設立鴉片禁會會中
有人在議院者皆力言販賣鴉片之非惟鴉片嗜食者服
流毒已深非一旦所可禁絕潛移默化須寬計以二三十
年之久卽于其中暗寓一禁止之良法焉因思印度政府
雖以鴉片爲大宗然善理財者究未可恃爲度支正項况
議院騰謗已多竊揣此項終須截止惟鴉片歲稅八九百

萬金磅為款既巨非積至二三十年徐圖別項以彌縫之
 則亦速事雖異理正同也法莫若共商一安善辦法使印
 不宜歲出鴉片或專售于中國國家或專售于中國所指為
 承攬公司通盤交易不復轉他商之手將鴉片出口箱
 數立一定額每歲遞減約積至二三十年之久減完自然
 禁絕如是辦法則銷售鴉片之權操自兩國國家中國于
 進口鴉片無虞奸商之偷漏貴國于出口鴉片亦歲有定
 項之可收數十年間無待仰眾商之鼻息且使貴國嘗議
 鴉片者見減裁有法羣喙自塞善全之策莫此若也貝
 云余會細為詳察此法未為不善但其中節目甚多苟非
 詳細籌商亦有難以猝定者請悉數焉如中國國家每歲
 自行承買與中國指准商人公司承辦一節于我鴉片稅
 項原無贏絀然尤以貴國公家與我交易則歷來販運
 係國體易于取信遠勝公司又況權在公家則歷來販運
 鴉片之商無從饒舌此國家承辦與公司承辦所當分別
 熟商者也印度鴉片共有三種姑公二種專歸官辦此二
 種專售貴國其事不難至白皮煙產于瑪爾注乃我國藩
 屬由彼為政第于孟買出口時每箱抽征七百羅貝非如
 前二種悉由官廠收賣者可比查白皮煙銷于貴國者亦
 復不少如欲同上二種專售貴國非由我先向該藩統購
 事不可行然中多轉折辦理匪易此三種鴉片一例

出售所當籌一善法者也查印度鴉片進項年來歲增一歲倘使專售中國堂堂兩國交易豈有下同商賈議價爭價之理勢必預定一價每歲不易則此價值或從最高抑從最卑或統較歷年之價而求一適中高下之價此鴉片價值所當議一定數者也按國家新創稅項必積至數年方有實效今鴉片歲銷若干箱箱征若干稅已有正數若干將此數每年一減為時太促難籌別項彌縫或限五年一減將遞減之數積為通減則稅項不形支絀且可省每歲筆舌之煩此一年遞減與五年通減所當籌一定則者也鴉片稅項每歲至九百萬金磅為數甚鉅且厥局資本甚大員役尤多二三十年全停之限未免過迫若不若寬訂五十年較為從容此禁絕之限或三十年或五十年所當籌一定則者也凡此數端

善定耳余知鴉片亦為貴國稅項大宗今聞欲加釐金釐加則偷漏愈多假如此法一行無虞偷漏而鴉片稅項復可任意增加吾二國和好已久既有關于貴國之益者斷不阻難也余云吾國之加釐亦即暗寓漸禁之意至度支自有正項假如欲向鴉片籌餉則開內地鴉粟之禁由官抽稅自行販賣一如貴治之例每歲進項又豈止六百萬金磅此法一行則印度出口鴉片日減而歲入之稅亦日減矣故吾國現議開禁種烟者頗不乏人惟我傅相心維大

記行卷三

局以爲與貴國和好已久事有關乎印度度支之巨欸特
遣本道來此訪一兩全之策如專爲籌餉起見則有開禁
鴛粟之法在貝云印度鴉片味厚中國土煙味薄華人多
捨薄而取厚貴國鴛粟之禁雖開其銷售未必能廣而印
度鴉片之暢銷自若也余云中國土煙銷售不廣者良以
裁種鴛粟有干例禁民間偷種不多祇銷本土至味薄之
故皆因民間偷種未敢公然設立廠局講求製法倘禁例
一開銷售既廣行見煙製日精煙味日厚安見終讓印度
哉今則我國計不出此但願外來之鴉片日減內地之鴛
粟日稀使吾民不受吸鴉片之巨禍並使貴國可免賣鴉
片之訾議所謂一舉而兩得也貝云鴛粟之禁與不禁權
在貴國土煙之銷與不銷權在吸者但以貴國所願通盤
承買鴉片一節于印度度支攸關故不得不慎重詳論也
余云所論各節未爲無見至云公司承辦不若國家自行
承辦之易于取信且爲得體是不盡然貴治之例向來官
商交易未爲失體且每年進項未見短絀並無失信之虞
何獨于華商而疑之不知卽歸公司商人承辦亦必領有
我國憑照仍與國家無異貝云吾國與商人交易原無分
于彼此惟既與中國公司交易則此事專歸數華商而向
之鴉片販商皆將歇業萬一公司中道虧折不能承購而
原商改業不復販此是鴉片巨項虛懸無著貴國家將何
以處我況公司承辦權在商人隴斷一專流弊滋甚貴國

恐難一一精釐故不若國家自辦之安也余云公姑二煙
歸官賣者無論矣至白皮一種既出藩土不識貴國有何
善法能使白皮與以上二種一例專售我國否貝云一時別
無善法貴國既不能自向該藩購買惟有吾國自向該藩
收買但該藩征收鴉片之稅向不由官經理是當遣員專
向該藩地種煙業主盡數包收似此辦法亦非易易然若
我二國堅志欲成此事當另有良法可以徐圖況印度政
府既許貴國統售鴉片則難不在貴國而在印度矣余云
每年鴉片之價原宜劃一但查貴治去歲所估鴉片稅項
止六百萬金磅雖年終加收至八九百萬金磅究于度支
正額可有可無則將來鴉片定價當做照原估之數不必
據實收之數為憑貝答云原估鴉片之數特指少者而言
至溢出二百萬金磅即可津貼鐵道築路洛河以及前歲
與亞夫汗交戰之費印度債款甚巨鴉片羨餘僅堪彌補
豈得視為可有可無總之此事他日兩國遣使熟商定價
自從公道斷不令貴國向隅也余云歷查印度度支出入
全數見運出茶葉棉花加費等稅歲增一歲鐵道等津貼
歲減一歲以前項溢出之數即可補鴉片每歲遞減之數
似無庸必俟五年再行通減貝云茶葉棉花加費皆屬新
增豐歉尙難預定兩國辦事總須推誠相告倘今歲煙數
已減而前費未能溢出既不能復令貴國補足而吾國度
支必形支絀故擬五年通減並限五十年減絕令理財者

優游歲月可徐圖萬全無害之善法耳以上所論不無過慮他日兩國遣使公議此事自有至當不易之法至于鴉片一事通盤辦理兩國皆似有益無損大略可行余意亦同如英廷詢及此事余必從勞力贊加之詳細籌議當可冀其有成也 既歸館披書略坐制軍忽函招乘輿往見則茶會也官紳士女七八十人廣眾中未便與商公事少坐遂歸復接黎制軍函固請二十日晚宴

十六日晴午刻復往晤貝冷暢談歸將所論鴉片情形撮其大略電報傳相下午外部委員來詢連日館居安否溫語謝答之晚默記問答諸條繕寫節略

十七日晴土人以所產珍寶諸玩物來售卻之午餐後往電報所付價掣取收條途次見希馬拉雅山雲開雪燦與人云距此尚三百餘里歸後繕發上傳相稟件擬十九日

赴制軍宴後二十日即可啟程由孟買乘公司船返滬晚
至總理兵部項答生處晚膳同坐者半屬亞富汗凱旋兵
官來此消夏者內有數人云曾踰希馬山入中國後藏界
名西畢奇馬行約四五日程爲華官所阻遂回

十八日曉起微雨早餐後外部隨員伽齊攜一粵人來見
謂十五年前販茶至此久居已成家矣今賞本告乏餬口
維艱贈以羅貝數枚而去午後往謁新任外部格郎德能
法語敘談良久自云以武弁至印度差委咸豐八年兵變
之役亦與焉瞬逾二十年今陞此任二年將退休矣前任
外部雷君已奉英廷之旨陞遷笨耶省督理現乞六月假
回英再赴新任語畢辭歸

十九日晴有總理印度稅務名郝西爾者邀往早膳同席二十餘人皆各口總理稅務司至此消夏者詢以印度稅項之數云歲約二百五六十萬金磅較十年前減去四五十萬後此將歲減一歲蓋印度出口稅以米穀爲大宗鴉片不與焉惟穀價已昂加以關稅則銷售不廣其進口稅以棉布爲大宗今亦自立織布局以與英之織廠爭市若於英國棉布仍征進口稅則英之織局勢將閉歇誠使將此稅裁汰則關稅歲出惟有運至貴國鴉片七八百萬金磅而已問以前聞印度內地設有關卡今自加爾古答至此四千里之遙未會一見何歟答云前者印度關卡專爲緝訪私鹽而設南北綿亙六千餘里行役七千餘人所費

甚巨今與土酋約卽於產鹽之地抽稅歲七百萬金磅每口均攤歲稅七十文故關卡巡役盡行裁撤而商民便於貿易矣因出其歷年在印度所收中國古甕大小數百件光怪陸離似非贗物攷元太祖封其駙馬帖木耳於賽馬爾罕城南并印度立大蒙古朝歲由于闐慈嶺運中國茶葉甕器者絡繹於道至今蒙古王之故宮甕器羅列古甕之多良由此歟今則鵲巢鳩居爲他人有殊可惜也午後格郎德來晤謂黎制軍將有致傅相函件交余賚呈渠遂邀余二十一日晚宴余力辭而別

二十日晴出辭外部戶部兵部各總理未晤蓋往制軍處集議也途遇外部隨員伽齊自制軍處來謂今集議無暇

會晤殊深悵仄今晚往宴便可辭行歸接貝冷書邀明日早膳亦答書辭別午後制軍復遣伽齊賚呈傅相函來並謂制軍聞貴道明晨啟行業已飭備車輛並電知鐵路總辦另備妥車以待且一路車價皆已發付固辭不獲因謝納之七點二刻至制軍處晚宴會者六十餘人坐余於其夫人之右每進一餐則奏樂一闕席散邀觀跳舞會囑余回津多多致意傅相並言鴉片之事貝戶部所言已無剩義且謂此間事務冗煩頗不樂居明歲將辭職回英貝君適來坐談半時之久辭謝回寓修書一封留致貝冷謂回華後如有書來詢及鴉片事尚乞指示云

二十一日四點鐘整理行裝下至山腰車廠則輿夫未起

起則索費不已比啟程已五點二刻冒露甚寒馬下阪行頗速磴道回折瞬息而過下視朝暾乍吐晴靄流輝頃復煙霧迷濛咫尺莫辨中途暴雨殷雷馬逸不能止上視捨訝欬側欲墜車過其下心膽驚懾飛溜橫濺衣履沾濡十二點二刻至山下喀爾喀已行百五十八里午餐後換高車行渡灘河數道六點鐘至益巴喇行百二十五里晚九點鐘上火車熱甚向南行所過平野卽古之薩他泥溼伐羅與宰祿勒那二國元樊謂其地溼宜稼土人稱爲福地今亦秔稻盈疇每歲二穫然光緒二三年奇荒赤土千里餓殍相望英人發賑至六百萬金磅現闢鐵路運糧甚易饑饉可無慮矣

二十二日晨車進戴蘭城城闕壯麗有故宮在焉街道甚闊兩旁樹陰蔽日早餐換車西南行入土酋境車轍狹僅三尺初英人始築鐵道土酋畏其長驅入境不願築焉尋見鐵路之利終畏英人之偏因築道而狹其轍意謂英人不得連軌而進嗚呼當蒙古朝盛時撻伐西人西人莫敢誰何迨政教不修互相侵伐遂爲英人并吞國之存亡詎關鐵路之廣狹哉午後至彭代古依

卽元

契所云波理哩羅與秣菟羅二國地今則總稱之曰喇隰蒲大羅袤長千五百里內列酋長數十各治其土有英官監之按英人與其藩屬立有條約雖不盡同大要有二一約土酋非奉英朝之命不得擅自興兵一約酋長當養兵

若干名英國有事鄰境當助之且歲輸兵費若干至國內政事雖可專行而大計一稟諸英監立約之後英仍蠶食顧藉口於土酋之不遵盟約暴使其民奪其政柄而自代之如烏大王黜居加爾古答是也土酋沒後無嗣亦霸占之而土酋無嗣者眾皆畏英偏威豐八年兵變之役羣思蠢動其明年印度制軍請於英廷許土酋無嗣者以支庶承襲遂安焉今則英人監其國不參政事殆利其不治可藉爲口實歟所過平野荒蕪山嶺盡童車棧卑陋肴饌麤惡子正過埃及米爾英兵屯所幅員不滿數十里英人踞此所以控扼東西也

二十三日晨晴東見高哇亞山重岡疊嶺頗饒秀色內有

烏地坡城乃印度王那納所建初蒙古王踞有戴蘭爲印度總王印度酋裔逃避山內誓不欵降因築此城以居十點鐘至諾諾早膳自昨日二點鐘至此始食蓋沿途無可食者午時車中炎熱異常平野沃衍卽元奘所稱瞿折羅國晚七點鐘至亞末大巴始入孟買省界自戴蘭至此三十六點車行五百八十邁晚餐畢換寬車南行按亞末大巴在明永樂九年爲波斯朝建都之所波斯王盡毀印度之梵寺以建其宮宏壯無有倫比至隆慶五年爲蒙古王所逐降爲府治嘉慶二年英人踞之十一點鐘至包羅陀英藩屬也光緒元年英之監理者暴亡英人謂其酋鳩死訊鞠之兩造各執一詞審院不得持其平英制軍謂其不

堪任事削之立其孺子輔政者名瑪大哇羅土人頗稱其賢自此車盡沿海南行

二十四日早二點鐘車過蘇刺佗元英謂其地當西海孔道人皆販海爲業西據莫鹽河現於河上建鐵橋以通火車考蘇刺佗自古爲印度與歐洲商販海口故前史皆有身毒西商大秦之說惟當時商舶或取道紅海或徑由波斯灣率無信風爲准漂沒無常自弘治十一年葡萄牙水師官瓦斯商繞亞非加大浪山角而至南印度加利葛持口正德十年復至蘇刺佗見海口環抱可泊船且近中印度遂築居焉萬曆四十年英人始遣使臣名安瑪由此入見蒙古王爲議約之始十點半鐘至孟買寓焉午後往訪

開往上海輪船則須遲至八月初一始有英公司開行歸
倦甚卽寢

二十五日往訪其埠撫軍則在山內布那城避暑距此三
百餘里旋晤其參贊名孟德肋謂適接其撫軍來電飭爲
余照料一切并邀余往其別墅小住余以孟買無事約以
明日午後乘火車往渠邀余晚膳諾之回寓天氣炎蒸汗
如雨注辰刻呼車出游過通衢則崇樓廣廈櫛比如雲官
舍局所皆以石甃成高聳雲漢尤稱雄壯街市寬廠幾與
英之倫敦相埒至敖嗽巴島遂沿海行策馬其巔下視環
岡廬舍萬家中襟椰林濃翠紛披如著色圖岡陰有一圓
塔塔頂平臺則包社人死後陳屍之所按包社人敬日月

星大騫罕謨回祖東侵包社強其民人服教其民人多有
逃至印度者千二百年棄屍鳥食之俗未能替革尋過市
集則夕陽西下燈火星繁擊肩摩四方輻輳者不一其
國誠西印度一大埠頭也按孟買一島初爲蒲萄牙所轄
英人垂涎已久順治十八年蒲萄牙王以女妻英王加祿
第二世遂以孟買爲奩賞加祿與印度公司約歲稅銀十
金磅時孟買居民無逾十萬公司於是濬海口減稅額廣
招徠期年之間戶口六倍於昔至同治十年增至六十四
萬五千內以印度波羅門教爲最多回教次之包社人又
次之西人七千猶太人二千華人百數而已波羅門種每
晨以白沙塗額爲橫豎圈形以別門戶豎者敬善神橫者

敬惡神其不塗面者則印度之賤種波羅門屏不與齒回
教率皆服買包社人類操英語善買多財然鄙吝特甚間
有施財以創善舉者英后則錫爵銜以風富商猶太人之
最富者則沙遜也歲納鴉片稅數百鉅萬英后借賑濟爲
名錫以男爵孟買海口四面環山無風濤之險商舶梭織
各國皆有輪船公司以通貿易推其興旺之由則在花旗
南北交戰之時初歐洲織布廠皆用美國棉花及美內亂
棉花無出於是英人競往印度收棉印度歲出棉以億萬
計迨同治八年鑿通蘇合清河販舶來印度者不復繞大
浪山計程二旬日則印度與美國之距歐洲適相埒而印
度之棉遂壟斷歐土矣及今印度自設織廠而英人織廠

幾無以自立始有尾大之患回憶花旗亂時洋商亦至中國販棉市僧滲水冀浮秤以取利棉過赤道盡腐朽不可用而販商遂絕誠能以中國有餘之棉運往英國使償印度鴉片之利則元太祖征印度取吉貝回之功又豈特衣被天下一時而已哉奈何爲一二奸商致失事機仍令鴉片無窮之漏卮歲輸印度爲之闢鐵道爲之濬河渠印度之民日富中國之民日絀可慨也已至孟參贊處晚膳欸待甚殷席散辭回

二十六日晴午後至火車棧二點鐘開行五點鐘至熬山之麓地名葛蘇查南印度地雖稱平原然聳出海面至二百餘丈東印度海濱平坦以次漸高近孟買處則有熬山

陡峙綿亙西海之濱葛蘇適在熬山之東麓山腰羊腸鳥道車行甚緩瀑布數十道匹練橫空飛珠濺玉清人心脾六點二刻至康大喇則已踞山巔其東則平原彌漫其西則蒼波浴日峯壑高下晦明百變真奇觀也八點鐘至布那撫軍已命參贊赫德駕車來接遂同乘焉至見撫軍少坐進膳欸談甚得旣於廊下乘涼約明晨七點鐘相晤遂辭至客房鋪陳甚都旁有浴室以五色石鑲嵌成文精緻殆無倫比土人皆衣鑲金紅衣以侍按撫軍名福葛松年近五旬前撫新金山今調斯任勤政愛民有足多者晚涼甚殆類深秋

二十七日晨起進茶點少許撫軍邀游花園先至其廐有

馬四乘矯健絕倫皆產新金山者福君親秣之旋觀車棧大小七八輛鑲金鏤銀光澤可鑑繼游其園奇花燦爛編種成文古木參天不漏日景至球場則其參贊隨員已先在撫軍解衣爲蹴鞠之戲戲畢謂余曰此養身之法余晨起必沐沐後游園拋球半時方進書室披覽新聞紙畢早膳十一點鐘入解視事至午後四點鐘乃歸歸則披書自娛至六點方息早膳畢撫軍邀余同乘至其公廨撫軍自御路人見之各避道以手加額撫軍亦答之至廨與各屬員相見而鴉片稅務總理名巴哈克有事他往計明日當道經孟買撫軍卽欲電知巴員回部那余謂不若明日余回孟買與晤因電知該員在孟買相候撫軍繼云聞貴道

來辦鴉片事昨接制軍來文囑余相助不識貴道所需何
事答以此行專爲求鴉片情節前來在西末喇業已聞所
欲聞惟貴治鴉片非由官賣每歲稅項甚鉅章程可得聞
歟渠云此事巴員知之甚明余不得其詳旋卽行文飭巴
員將各色章程明告無隱余申謝旣命其隨員與余同乘
徧謁各局總理並陸師提督回復偕撫軍同乘至其別墅
詢及中國鴉片歲稅之數答以值百抽二十現擬加至三
四十恐無善法以防偷漏故特來訪問彼云值百抽三十
稅甚輕印度鴉片出口稅有抽至值百抽百二十者出口
如此入口不當愈重乎余思印度政府必能助貴國成就
此事尋過一岡上有礮壘撫軍云此瑪那他王見其軍敗

投崖之所按印度蒙古朝盛時未及二百年南有瑪那他族專事剽掠日削其地遂都布那奄有西北中印度之半幅員甚廣且侵及英之轄地英人患之興兵糾土酋合勦嘉慶二十三年進攻布那滅之自是土酋雖寢衛而英人亦終不復有瑪那他之虞矣八點鐘晚宴座客皆各局總理共二十二人席散坐談良久送余至室以其影相爲贈二十八日晨五點鐘赫參贊駕車送至鐵路五點二刻開行十一點二刻至孟買午後三點巴哈克來訪遂詢以鴉片事答云稅額歷年遞加迄無定則白皮煙產於藩屬土酋征其賦販商向業主收買凡欲運往孟買者則先向內地英員呈請運單每箱納稅銀七百羅貝然後由鐵道運

至孟買出口時呈單查驗而已當鐵道未開之先土人販商之偷漏者視出口之數五分之一現有鐵道進出口貨皆出其途走私者不及百分之一問以鴉片既爲公項大宗曷若貴治自向土人統買不准他商販運則永絕偷漏之門復得增價之利答以此法五十年前已行之矣惟土人無信不願將所有鴉片盡行售賣故留有餘以爲走私之計而土酋亦不樂英員在其境內到處搜檢故改爲抽稅章程初則每箱征百五十羅貝今則各處鐵道已開方漸次增至七百之數詢以由官收買之法旣已試行惟虞出口偷漏之多故爾中止今鐵道幅輳孟買旣無偷漏之虞似可再行收買之法矣答以此法所難者恐土酋嘖有

煩言然使印度政府志在必行亦易事也問以販運洋商若從中阻撓將若何答云不足畏也因向索收稅章程允以明日遣价賫至余卽與訂明晨十點鐘往晤焉

二十九日十點鐘至巴哈克處晤談出書三卷卽歷來所訂鴉片稅則章程辭謝而歸午後接雷戶部來函謂他日垂問必瀝誠以告云三點鐘沙遜行主名沙落滿來晤謂余曰貴道此來所辦之事若何答以此來不過訪求情形並無辦理之事問以貴國於進口鴉片意見若何答以皆宗加稅之說業已定加百五十兩矣然有議及開種鴉粟之禁者此說不爲無見內地若種鴉粟則進口鴉片日少而貴國征收洋商之銀亦日少旋答以洋商之銀仍出於

吸食之華人耳子精會計計不及此耶適匯豐銀行主諾
貝肋來訪並約同乘往觀船塢遂辭沙落滿而行至見船
塢袤廣四十餘丈皆登以石深三四丈門有閘以司啟閉
塢由官築商船入塢者日稅若干旁列倉廩千餘間穀貨
充牣連軌鐵道船載四五千噸者盡一日之力足可裝卸
自船塢成而商船麇至不復他往鄰埠矣諾貝勒邀余晚
膳膳畢因囑其明晨爲余購船票云

八月初一日晨起整理行裝十點鐘英國公司總理名巴
爾克暨船主名里梅來來謁謂接福撫軍來電囑備寬艙
以待並言舟次船塢明晨開行余再三申謝午後出辭諸
相識者四點鐘令僕送行李上船晚膳畢早歇

初二日八點鐘上船船名克什葛爾馬力四百五十四頗
窄隘蓋公司船之最小者九點鐘開行出塊候潮午正開
駛向南二點鐘島嶼不復可辨風順舟穩

初三初四初五日晴風微海靜日行約二百八十邁

初六日六點二刻泊錫蘭島之伽蘭口午後登岸散悶往
觀一梵寺適有沙門自暹羅迎貝葉經至設花供養男女
蟻至向佛像頂禮并環一窰堵坡羅拜作祈福狀觀其貝
葉視蒲葉加厚剪成笏形疊葉成書旁飾以金中書古印
度文藏諸盒內按錫蘭島晉法顯所稱師子國唐元奘名
僧伽羅國春秋時佛王僧伽刺治兵浮海而往遂有其國
國民至今信佛夫印度佛教歷漢魏甚盛至唐中葉方爲

波羅門逐去諸僧徒流入西藏至今廓爾克克什彌爾西藏蒙古諸佛教猶其遺緒而錫蘭佛教遂蔓延於緬甸暹羅安南歷二千餘年而猶盛錫蘭在印度史記爲新甲刺譯言瓊島卽元奘所稱僧伽羅也今則土人稱之曰郎伽殆元奘所謂楞伽山昔如來於此說楞伽經而得名歟錫蘭先屬荷蘭乾隆五十二年英人奪之現屬英國非印度制軍所轄內闢鐵路植加費稅項頗可自贍晚風雨大作覓寓而宿

初七日早膳後上船午刻起旋向東行風急舟蕩有客來自紅海者謂見中國新製碰船二艘前月二十二日已駛過新開河云

初八初九初十日晴風利日行三百邁初十晚九點鐘過蘇門答喇北角名阿素有燈遠燭

十二日晨六點二刻至檳榔嶼暴雨時至登岸一游而回午後四點鐘開向東南行風猛舟甚簸蕩

十三日晨舟入麻六甲峽海平如鏡正午見遙山疊翠拱揖迎人無復波濤之險

十四日晨七點鐘至新加坡早餐畢聞左子興自倫敦至遂往訪焉坐談良久因悉黎蕤齋與左君同返留書致余往來相左僅及半月不覺悵然旋偕子興往謁埠內撫軍少談而別晚左君固留晚膳膳畢回舟夜間月色迷濛水面無風蚊雷隱隱不可假寐

十五日晨六點鐘左君復來送別八點鐘起旋向東北行
風微海靜午後微雨

十六日暴雨時至十七十八十九日晴風平浪靜炎暑異
常每日約行二百九十邁

二十日晴西南風作舟甚搖蕩午後五點鐘舟泊香港匯
豐行主甲克松至船持傅相八月初一日所發電示來閱
旋上岸借宿

二十一日晨訪燕制軍業已北上午前往謁歐參贊坐談
片刻至循環日報館王紫詮處有鄭玉軒星使留寄一函
午後少憩晚九點鐘上岸風大作

二十二日早風狂雲黑小呂宋來電謂颶風發自東南尅

期至港船主起旋開行泊於港外山陰以避之八點鐘雷雨交至濤若山湧舟簸蕩不定沙霧迷漫白晝爲昏風從四集故云颶風西人稱曰泰風不識何典意卽颶風之轉音耳中國南洋有西南信風與東北信風各令半年當二信風交會之間勢不相下則積爲颶風颶風發自小呂宋向北行至臺灣臺灣山高一千五百丈足以屏之其東北風弱者則颶風北上至日本等處其西南風弱者則颶風西至香港安南等處今適東北風交令故由小呂宋略香港之南而往安南是日午後風息雨止至晚復作蓋颶風卽旋風早當其北半週午後適當其中晚則其南半週耳二十三日晨晴七點起旋開行風息浪湧餘波未平舟傾

側不可立

二十四日過臺灣峽二十五日東北風大作一小時僅可
行八邁

二十六日晚九點鐘至滬

適可齋記行卷三